

III – PLAN I PROGRAM OBUKE ZA STRUČNO OSPOSOBLJAVANJE I USAVRŠAVANJE DOBROVOLJNIH VATROGASACA TOKOM GODINE

27) Dobrovoljni vatrogasci, koji su u sastavu dobrovoljne vatrogasne jedinice dobrovoljnog vatrogasnog društva ili pravnog lica, dužni su tokom godine u svojoj jedinici prolaziti obuku za stručno osposobljavanje i usavršavanje, prema Planu i programu obuke za stručno osposobljavanje i usavršavanje dobrovoljnih vatrogasaca tokom godine koji se nalazi u Prilogu 9 (u daljem tekstu: Godišnji plan i program obuke), pod neposrednim nadzorom i uputama nadležne općinske/gradske službe civilne zaštite, odnosno kantonalne uprave civilne zaštite.

1. Nosilac izvođenja godišnjeg plana i programa obuke

28) Nosilac izvođenja godišnjeg plana i programa obuke je dobrovoljno vatrogasno društvo, odnosno pravno lice u kojem je formirana vatrogasna jedinica.

Nosilac izvođenja obuke iz stava 1. ove tačke, za organizovanje i provođenje obuke osigurava finansijska sredstva i obezbjeđuje:

- učionicu - prostoriju za održavanje stručne obuke u kojoj će se izvoditi teorijski dio obuke,
- poligon za obuku, uvježbavanje i kondicioniranje vatrogasaca, na kome će se izvoditi praktični dio obuke i kondicioniranje,
- prostoriju sa spravama za vježbanje i sticanje fizičke kondicije (multifunkcionalne sprave, treneri, steperi, bicikli, tegovi, pokretne trake i drugo),
- vatrogasnu tehniku (vozila, ličnu i zajedničku zaštitnu opremu, aparate za gašenje požara, druge sprave, opremu i sredstva),
- nastavna i druga materijalno - tehnička sredstva potrebna za izvođenje obuke.

29) Nosilac izvođenja obuke iz tačke 28) stav 1. ovog programa obuke i polaganja ispita, na prijedlog komandira dobrovoljne vatrogasne jedinice, utvrđuje izvedbeni godišnji plan i program obuke za stručno osposobljavanje i usavršavanje dobrovoljnih vatrogasaca, na osnovu

nastavnih tema i jedinica utvrđenih u Godišnjem planu i programu obuke, a uzimajući u obzir procjenu ugroženosti od požara područja kantona i općina, odnosno grada i pravnih lica, vatrogasnu tehniku sa kojom raspolaže jedinica i druge uslove.

Izvedbeni godišnji plan i program obuke iz stava 1. ove tačke potrebno je da sadrži detaljne opise nastavnih jedinica, oblike rada, nastavne metode, sredstva, pomagala i potrebne mjere zaštite tokom izvođenja obuke.

Nosilac obuke obavezan je voditi odgovarajuću evidenciju o prisustvovanju obuci i postignutim rezultatima nakon provedene obuke za svakog dobrovoljnog vatrogasca u jedinici.

2. Realizacija obuke

30) Prema utvrđenom izvedbenom godišnjem planu i programu obuke iz tačke 29) stav 1. ovog programa obuke i polaganja ispita, izvođenje obuke u dobrovoljnim vatrogasnim jedinicama dobrovoljnih vatrogasnih društava i pravnih lica, obavljaju komandiri dobrovoljnih vatrogasnih jedinica i druga stručna lica koja se odrede u tom planu i programu (instruktori za stručnu nastavu i instruktori za tjelovježbu iz profesionalnih vatrogasnih jedinica, stručna lica iz dobrovoljnih vatrogasnih društava, vatrogasnih saveza i druga stručna lica).

Komandiri dobrovoljnih vatrogasnih jedinica i druga stručna lica iz stava 1. ove tačke (u daljem tekstu: Izvođači obuke), za pripremu i realizaciju nastavnih tema i jedinica, kao i vatrogasci iz tačke 27) ovog programa obuke i polaganja ispita koji prolaze obuku, koriste propise i literaturu koja je navedena u Uredbi, kao i druge propise i literaturu.

31) Izvođači obuke koriste različite oblike rada i nastavne metode (kombinovanu metodu izlaganja sa razgovorom, metodu ilustracije, demonstracije i instrukcije, metodu praktičnih radnji, metodu igranja uloga i druge), prilikom izvođenja obuke.

32) Izvođači obuke vode dnevnik o provedenoj teorijskoj obuci, praktičnim vježbama, zadacima i kondicioniranju u koji upisuju, nastavne teme i jedinice, broj nastavnih sati, termini provođenja obuke i vježbi, prisutne i odsutne vatrogasce.

33) Komandir dobrovoljne vatrogasne jedinice i komandir vatrogasne jedinice u pravnom licu, planira i provodi stručno osposobljavanje i usavršavanje vatrogasaca i odgovoran je za realizaciju obuke iz tačke 30) stav 1. ovog programa obuke i polaganja ispita.

3. Testiranje i provjera osposobljenosti

34) Nakon provedene obuke iz tačke 27) ovog plana i programa obuke i polaganja ispita, organizuje se pismeno testiranje, praktična provjera i provjera fizičkih sposobnosti (kondicije) za svakog vatrogasca, u skladu i na način utvrđen u tač. 14., 15., 16., 18., 20., 21. i 22. Plana i programa obuke za stručno osposobljavanje, uvježbavanje i kondicioniranje profesionalnih vatrogasaca ("Službene novine Federacije BiH", broj 67/13).

Za provjeru fizičkih sposobnosti koriste se slijedeći testovi:

- trčanje na 30 metara,
- sklekovi u jednoj minuti,
- podizanje trupa u jednoj minuti,
- čučnjevi.

Provjera fizičkih sposobnosti utvrđuje se na obrascu koji se nalazi u Prilogu 10.

Ukoliko se na provjeri fizičkih sposobnosti dobrovoljni vatrogasac ocjeni "ne zadovoljava", upućuje se na dopunsku obuku kondicioniranja.

- 35) Izvođači obuke dužni su sačiniti zapisnik o provedenoj obuci, testiranju, praktičnoj provjeri, kao i provjeri fizičke sposobnosti dobrovoljnih vatrogasaca i dostaviti ga odgovarajućem organu koji je utvrđen aktom dobrovoljnog vatrogasnog društva, odnosno odgovornom licu u pravnom licu.
Ako vatrogasac odbije prisustvo na obuci, dodatnoj obuci, testiranju, praktičnoj provjeri ili provjeri fizičkih sposobnosti, čini povredu dužnosti i podliježe odgovornosti utvrđenoj aktom dobrovoljnog vatrogasnog društva, odnosno pravnog lica.

4. Izvještaj o realizaciji obuke

- 36) Komandir dobrovoljne vatrogasne jedinice, na osnovu zapisnika i dokumentacije iz tačke 34) ovog programa obuke i polaganja ispita i izvršene analize, izrađuje izvještaj o realizaciji obuke, koji sadrži ostvarene rezultate, uočene nedostatke, prijedlog mjera za unaprjeđenje obuke sa zaključcima.
Izvještaj iz stava 1. ove tačke, komandir dobrovoljne vatrogasne jedinice dostavlja nosiocu obuke iz tačke 28) ovog programa obuke i polaganja ispita, kao i nadležnoj kantonalnoj upravi civilne zaštite.
- 37) Nositelj obuke iz tačke 28) ovog programa obuke i polaganja ispita, razmatra izvještaj iz stava 2. ove tačke, nakon čega izrađuje izvedbeni plan i program obuke za narednu godinu, uvažavajući prijedlog mjera za unaprjeđenje obuke i zaključke sa prethodno provedene obuke.
Izvedbeni nastavni plan i program obuke za narednu godinu nosilac obuke dostavlja nadležnoj općinskoj službi civilne zaštite i kantonalnoj upravi civilne zaštite.

IV – ZAVRŠNE ODREDBE

- 38) Od obaveze polaganja ispita za dobrovoljnog vatrogasca i rukovodioca akcije gašenja požara oslobođena su lica koja su položila stručni ispit ili ispit za dobrovoljnog vatrogasca i rukovodioca akcije gašenja požara u dobrovoljnom vatrogastvu, prema Pravilniku o stručnom osposobljavanju i postizanju činova u dobrovoljnom vatrogastvu Bosne i Hercegovine ("Bilten vatrogasnog saveza BiH", broj 1/1984) i kantonalnim propisima koji su uređivali ovu oblast.
- 39) Kantonalne uprave civilne zaštite dužne su u roku od tri mjeseca od dana stupanja na snagu ovog programa obuke i polaganja ispita, otpočeti provoditi obuku i osposobljavanje, kao i polaganje stručnog ispita za sticanje zvanja dobrovoljni vatrogasac i rukovodilac akcije gašenja požara u dobrovoljnom vatrogastvu.
- 40) Dobrovoljna vatrogasna društva i pravna lica u kojima je formirana vatrogasna jedinica, dužni su u roku od šest mjeseci od dana stupanja na snagu ovog programa obuke i polaganja ispita izraditi izvedbene godišnje planove obuke i osposobljavanja dobrovoljnih vatrogasaca u svojim jedinicama i provoditi obuku za stručno osposobljavanje i usavršavanje dobrovoljnih vatrogasaca tokom godine.
- 41) Nadzor nad provođenjem ovog programa obuke i polaganja ispita vrše kantonalne uprave civilne zaštite.
- 42) Prilozi od 1 do 10 nalaze se u prilogu ovog programa obuke i polaganja ispita i čine njegov sastavni dio.
- 43) Danom stupanja na snagu ovog programa obuke i polaganja ispita prestaje primjena Pravilnika o stručnom osposobljavanju i postizanju činova u dobrovoljnom vatrogastvu Bosne i Hercegovine ("Bilten vatrogasnog saveza BiH", broj 1/1984) i svih podzakonskih propisa kojim su uređena pitanja obuhvaćena ovim programom obuke i polaganja ispita, koji su se primjenjivali na

- području Federacije Bosne i Hercegovine do dana stupanja na snagu ovog plana i programa.
- 44) Ovaj program obuke i polaganja ispita stupa na snagu osmog dana od dana objavljivanja u "Službenim novinama Federacije BiH".

Broj 05-02/6-74-3/15
11. maja 2015. godine
Sarajevo

Direktor
Fahrudin Solak, s. r.